



«Insatgi che porta soccas cun «adiletas» vul metter in tschert statement».

FOTO HAMBURGERJUNG IS LICENSED UNDER CC BY-SA 2.0

## Tge èn las sandalas da la stad 2021?

La moda sa mida da stagiun a stagiun. La FMR ha dumandà persunas dal fatg tge model da sandalas ch'è en vogue questa stad e sclerì la dumonda delicata, sch'ins dastga purtar soccas cun sandalas? Part II da la seria da stad da Laura Schütz.

LAURA SCHÜTZ/FMR

### Atelier Alexandra a Cuira (Alexandra Wellenzohn, cusunza da vestgadira da dunnas):

«Questa stad èn ils uschenumnads «espadrilles» cun in chaltgogn a cugn (Keilabsatz) en moda. Plinavant èn sandalas cun crappa da color e talas che sbrinzlan dumandadas. Ils «loafers» cun franzlas u or da tgirom èn medemamain populars. Tenor mai na duess ins betg purtar soccas cun chalzers averts. «Adiletas» èn lubidas, però mo a chasa u en curtin!»

### Schuhhaus Wergles AG a Scuol (Seraina Gernet, possessura):

«Interessantamain vendain nus las bleras sandalas ordvart la stagiun. Ultra da quai funcziuna l'uman savens anticiclic, pia cumpra el sandalas era sch'igl è schleta aura. In'exceptiun èn ils flip-flops, quels vendain nus mo, sch'igl è fitg chaud. Sandalas sportivas da trekking che han ina lunga durada da vita èn spezialmain dumandadas. Purtar soccas cun sandalas – quai na va betg tenor mai. «Adiletas» èn medemamain in no-go, però vala la fin finala: «Bel è quai che plascha.»

### VereVita a Glion (Lukretia Candreja, cusseglia da colurs e stil da moda):

«Questa stagiun èn sandalettas elegantas cun in chaltgogn da bloc (Blockabsatz) e pantolettas da tgirom popularas. Tgi che vul insatge pli extraordinari ed è in tip sportiv cumpra sandalas da plateau. Flip-flops pon ins purtar tenor mai en il temp liber, però betg cumbinà cun chautschas lungas. Insatgi che porta soccas cun «adiletas» fa quai a mes avis per metter in tschert statement u demonstrar ina sort «Mut zum Hässlichen.»



Il mument èn ils «espadrilles» cun in chaltgogn da cugn (Keilabsatz) en moda.

FOTO SPERA.DE IS LICENSED UNDER CC BY 2.0



«Loafers» or da tgirom u cun franzlas èn populars.

FOTO MENSWEAR MARKET IS LICENSED UNDER CC BY 2.0